

vnd wo immer möglich / abbruch zu thun als haben die Herrn Staden rathsam befunden sich auch dargegen gefast zu machen / vnd sonderlich ihre Vnderthanen wider die strenge vnd tyrannische dienstbarkeit der Spanier / damit sie insonderheit das Schiffvolck so sie ertapt / geplagt / zu befreyē / zu welchem end sie ein floth von 31. Schiffen nemlich 27. Kriegs: vñ 4. Prouiantenschiff außgerüstet.

Hierzu haben sie einē dapffer vnd treffliche Mann gesucht vnd begert / mit namen Jacob Hemskirch vñ Amsterdam / welcher fürsichtig / klug vñ dapffers gemüth man wol hat abnemē können / auß der wunderbarlichen reys die er Anno 1596. vñ 1597. nebē Dioua Zembla hin gethā / in solche end vnd örter da niemals kein Mensch gewesen / allda er neben dem erfahrenen Steurman Wilhelm Berensen biß auff 80 grad gefahren / einen fürheren weg in China vnd Cathay zu suchen / vñ endlich auff 76. grad auff dem Land in einer hütten so sie darzu gemacht / vber winter bleiben müssen / da sie wol 3. monat lang ohne sonnenschein gessen. Desgleichen als er Anno 1604. zum andermal als Admiral in Ost Indien gefahrē / vñ bey Sincapura ein Portugalische Caraque oder grosses Schiff / darauff viel Geschütz vñ wol 800. Mann gewesen / allein mit 200. Man hat angriffen vñ erobert / vñ ein vber auß köstliche beut vñ schatz gen Amsterdam gebracht. Dieser hat sich seinem vaterland zu dienst gutwillig darzu gebrauchen lassen / nit wegen lohn oder solds / sonder allein auß liebe zur wolffahrt des vaterlands.

Jac. Hemskirch Admiral.

Die Armada bestund in 26. Kriegsschiffen / vñ 4. Prouiantschiffen / von welchen 10. von Amsterdā gewesen / nemlich das Admiralschiff Aeolus / auff welchem war Capit. Peter Wilhelmsen Verhoeff vñ Amsterdam.

Namen der Capitänen auff dieser Armada.